

四庫全書

集部

欽定四庫全書

集部

楊李詩繫卷四

詳校官侍講_臣王燕緒

主事銜_臣徐以坤覆勘

總校官進士_臣朱鈐

校對官編修_臣繆晉

膳錄監生_臣葛瀛

欽定四庫全書

稿李詩繫卷四

平湖沈季友編

元

張文穆公伯淳

伯淳字師道崇德人少舉童子科與內弟趙孟頫
人品相望舉咸淳進士至元中世祖遣程文海訪
求江南人才伯淳與孟頫並被薦入見世祖問冗

官風憲鹽筴幣對皆稱旨命至政事堂將重用
之固辭授翰林直學士詔令皆出其手同修國史
謁告歸卒謚文穆有蒙養集虞集為序其詩文耻
尚鉤棘春容紆徐鏗乎金石之交奏也

題太初壽星

北方有名畫吾愛馬雲章昔年遭亂離流落向武昌孟
氏授館餐遊戲翰墨場作此壽者相瞳碧髻毛蒼瑞芝
生坐石清心炷妙香珍襲知幾年上射牛斗光車書混

一後發此屋壁藏吾宗夢符君得之猶珪璋思與博雅
共傳寫入縑緗伊誰會筆意述者趙子昂毫髮無少差
後先相頡頏太初天下士展卷懷故鄉持此安所施素
壁映高堂人事有分合精藝足流芳托物尚可傳况乃
名譽彰願言斯文壽天地同久長

予入京

我昔到京師幾度望清光日食太倉粟亦有大官羊承
恩入翰苑竊祿三載強絲毫無補報轉頭松菊荒我歸

為丘隴駒隙雙丸忙及瓜不求代日星垂條章求閒遂
得閒初志或小償未老苦多病勸翼甘回翔箕裘汝當
勉弓冶本非良去去都門道絕勝鑑湖涼土深氣候齊
不同瘴癘鄉然於飲食間過多亦為殃揚沙風力勁外
邪襲空腸迷惑非一端蕩則流於狂此行分寸進造化
在廟堂奔走形勢途無益多所傷交遊不厭審非類宜
深防計日需汝歸秋風萼鱸香顧步無小差所到未可
量

題于越亭送梅君石祕校詩後

聖俞先生宣城裏經行修明教胄子不特詩名滿世間
紀載精詳繼前史當時晦叔誦其文曰二百年未有此
先生泰山北斗然管窺蠡測難為言我從聞孫見手澤
定知家學來根源繭紙可腐石可泐世美自有不朽存

送李公略

風雪滿吟鞍長江望眼寬宦清騰踏易聚久別離難人
去鶴應怨冬深梅不寒暮雲依舊碧幾度倚闌干

賈氏望梅樓

寂寞千巖萬壑秋欲窮望眼更登樓曾觀海者難為水
自出山來無此遊前代衣冠隨世運故園草木染春愁
重門深閉閒庭院難掩當年富貴羞

陸徵士正

正字行正自號率齋居士本名唐輔居海鹽之當

湖

今析
平湖

豐頷長耳端毅寡言精於律呂象數之學

與華亭謝國光皆有重名程文海求見兩人俱稱

疾不出後復與劉因同徵不赴隱居教授著正學
編樂律攷七經補註至治三年卒門人私謚靖獻

先生

古意

結禱事君子誓作形與影人事多乖戾彼此睽燕郢尺
書沉素鱗噓鵬催逝景妾命詎終薄君心那得冷開簾
花撲面淚落紛如綆

學易先生俞鎮

鎮字伯貞崇德人習朱輔之學為傳貽書院山長
至大中江浙行省薦授華亭教諭延祐間鄉舉第
一官至建德路知事其行草師李北海學通五經
尤精於易得其指授盡為聞人嘗榜其居曰學易
門人私謚為學易先生有修辭稿富春吳見心復
有題俞伯貞乘槎圖詩云瀛洲獨步玉堂仙曾從
靈槎上九天天上歸來人不識河源錯認漢張騫

延陵義塾詠桂

考見
題詠

西風起巖幽白露下蘂薄朝看木槿榮夕見芙蓉落檀
樂月間桂歲踐中秋約仙葩獨紛披芳宴競醕酢瓊宮
實高寒之子真綽約如來金粟影大士珠瓔珞何年分
化離此地樹寥廓語溪古多士往者我先覺陳門列三
魁莫氏敷五萼丹青翼堂構朱紫耀城郭鉅筆上高懸
靈根下盤錯事叶燕山碑調高淮南作孫枝日長大奕
葉陰綿邈終成仰攀志豈但延賞樂相期醉浮螳半夜
驂鳴鶴往持吳剛斧竊試嫦娥藥勿謂我言狂詩云善

戲謔

送崇德同知蔣蔣山滿解

法吏多慘黠文儒或迂拘世有弘達才奚必吏與儒蔣
君西湖彥身依北辰居皎質燦瑤枝清標瑩冰壺明於
鏡發奩圖若盤走珠貳州江湘表攷績政已殊剴劇來
禦兒依然發硎初儒宮新作興吏牘槩盡除惠澤到閭
閻愁歎成歡呼我歸從武林屬君方下車流氓方復業
矧我冠帶徒月吉會講席旬休挈行厨登臨境增勝談

笑訟遂無俄復三載過去作九萬圖非云重離別願言
惜居諸鵬隼鷺擊用棟梁廊廟須努力酬主恩揚名報
親劬盡職乃人臣素餐非丈夫我當握簡札采掇歌誦
餘上陳良史官為君細細書

大腹兒

塵匝夜禱輒犖山淫光下燭穹廬寒柳城健兒不敢睡
四野惡聲唬狗獐豬龍怒磯老梟腹鱗甲粗踈頭角禿
婪酣大肚三百斤偷得真龍半分福范陽羶帳妖潛形

平盧寶刀遲發硃金鷄口吐東北赦青螺啼作西南聲
鳳凰春池金鏡破獬豸霜臺胡眼大東風野鹿嚼楊花
白日妖狐登御座華清玉甃湯作泉洗兒果撒黃金錢
并刀剪綵十大幅錦裯墜碎宮娥肩象牀夜冷嬰兒哭
猪龍爪破金訶玉香齧不痛荔枝漿雄心已飽鷄頭肉
長安天奪蜜口臣銅頭鬼鼓漁陽塵赤心一夜變胡腹
二十四郡俱無人潼關夜漏鷄聲早馬嵬坡下冰山倒
劍兒西寄杜鵑巢練帶玉環埋翠草嘉山土門勒戰功

猪兒帳下屠猪龍旄頭星落大腹破機上鸞刀一尺紅
屠學正曾

曾字體寧小名一郎母樂夢王曾而生故名世居
海鹽乍浦北里許土家山永福巷

後析
平湖

宣慰楊耐

翁壻也少受書於吳草廬延祐中江浙行省薦為
學教諭至治癸亥中浙江東榜第一有虞廷慶雲
賦為藝林稱重授建康學正不就隱於家吳元年
籍沒楊氏其家遷避齊景鄉黃泥堰康僖公其裔

也

慶雲賦歌

溯厥皇虞敷天孝德蒸乂格姦祗載夔稟當宁升聞班
寮師錫有鰥登庸側陋皇赫徽典敎揆賓門覲辟左禹
右臯前稷後益愠解八風教訖四極

水邨隱君錢重鼎

重鼎字德鈞自通川徙居嘉興分湖之涯

後析嘉善

構

水邨聚書其中趙子昂為作水邨圖一時名士俱

有詩題之選存題咏卷中

題高士圖

在昔洛陽雪深丈餘士也高卧來令尹車今年吳淞雪
復何如積素一色鷗鷺有無之子江臯修亭是居有琴
有書有酒有魚賞靜獨眺聊以自娛挹茲清風凜凜起
予此景此圖再卷再舒

高升

朱太史彝尊以金蘭集見示云此係里人因載入

題徐良夫畊漁軒

山中遂高隱累世業畊漁江浦晚潮急湖田春雨餘自
緣甘澹泊何用借吹噓他日投簪去多君為卜居

索蠟梅花

蠟花的的猶緘綠應向山家十月開歲晚書窗甚寥落
誰能為寄一枝來

錢應庚

應庚字南金郡邑志皆失載邵復孺蛾術集中有

裏南金往海鹽省母詩有答南金知近寓秀水僧
寺詩有寄錢南金孝廉詩又有句云美人只在寒
雲外破屋依然谷水西南金又嘗居茜涇
今屬嘉善境
舊選惜無南金全作止錄聯句一首閱鐵網珊瑚
載復孺貞溪詞翰內有數詩復採存之

會合聯句

久別情裏在邵重逢意氣添窮途仍遠役錢吾道豈終

潛遲暮身何補邵艱危首尚黔客情鄉態別錢人事物

華兼豹隱曾誰見邵鷄羣適自淹故交深閤閱錢高誼

薄閭閻歲晚詩無恙邵更遙夢屢瞻盍簪長此地錢翦

燭近前檐近况俱相問邵幽期已素占真成談疊疊錢

更復坐檐檐弱冠交遊早邵通家學問漸訂頑唯汝益

錢知已不吾嫌春浦隨風鷁邵秋堂滴露蟾楚蘭愁共

擷錢湘管醉重拈村市魚蝦美邵盤餐筍蕨酣望雲歌

白苧錢跼月認青帘靜賞花當戶邵微吟草入簾平烟

孤野濶錢落日九山尖竹影棋枰潤邵苔痕屐齒黏風

流原不算錢文米頓能收芸業猶生計邵瓜田僅養恬

索居期自奮錢微祿覲同霑俗薄輕遺佚邵時清愧孝

廉每驚巢幕燕錢殊比上竿鮎屈賈時多忌邵商韓世

不厭固窮君子拙錢競進小人憚璞玉甘深韞邵鉛刀

苦較銛淳風難返古錢澆態日疑炎汨汨知何益邵斬

薪獨好謙富應同土苴錢貧不厭糞鹽暴白心如鐵邵

雌黃口莫箝妙年咸仕版錢長晝只書幃坐欲彈冠起

邵耕期束帛覘壯裏從曠遠錢短髮任髻鬢未屬麒麟

畫

邵

恒韜虎豹鈴淹留頻撫髀

錢

慷慨亦掀髯但得襟

期在

邵

何憂歲月殲匆匆投井轄

錢

忽忽報郵籤江海

無忘險

邵

冰霜已戒嚴詩篇相砥礪

錢

友愛辱鍼砭

邵

答復孺

與君相知最相憶春水東流春望深十年共坐燈火約
兩地忽牽江海心日落瞻烏誰屋上月明夢鶴故城陰
靡蕪滿地不可寄何以報此瓊瑤吟

閏正月得復孺先生去冬寄懷詩次韻奉答

忽見新詩慰濶疎，好裏憐爾獨思予。
無由橫泖同垂釣，依舊匡山借讀書。
自惜交情嗟老矣，即今世事轉紛如。
西園寂寞梅花路，腸斷春風處士廬。

題仲圭墨菜

老吳嗜好素淡泊，戲畫晚菘三尺強。
江南物價正騰踊，山中此味偏悠長。
冰壺立傳貴適口，碧澗作羹聊塞腸。
自古食焉難怠事，吾儒莫羨大官羊。

楊宣慰梓

梓世居海鹽澈川以豪富稱元時為宣慰使節俠
風流尤善音律與武林阿爾哈雅之子酸齋交善
酸齋善歌能製樂府散套梓得其傳雜劇中有豫
讓吞炭霍光鬼諫敬德不伏老皆其所著也嘗建
樓十楹以貯姬妾今稱宣慰粧樓云

過湖登樓

樓前秋水健帆開樓外秋風舞袖回
萬里梯航通鳥道四時風雨護龍堆
江山如此不一醉歲月幾何能再來

欲問老髯求鐵笛夜深吹上紫荆臺

譚復

復嘉興人詩見元音有見心小草

寄玉筍劉師復道士

玉筍峰頭玉作人梅花壇下讀丹經曉分露水洗明月
夜掃雲洲拾落星海鳥近傳鳬逕度泉琴誤許鶴同聽
何當謝却塵中鞅共倚松根斷茯苓

梅花道人吳鎮

鎮字仲珪嘉興魏塘人

後析嘉善

性高介善畫山水竹

石題詩其上時號三絕富室求之多不得唯贈貧

士使取直焉作字用畫筆如寫竹狀饒有天趣自

號梅花道人方元之季類多高隱倪元鎮居梁溪

楊廉夫居干將陶南邨居泗涇張伯雨居勾曲黃

子久居琴川顧阿瑛居玉山然皆風流縱誕廣延

聲譽之士片紙一出標榜互高鎮獨匿影窮鄉日

與羽流衲子為羣時或垂簾賣卜言多警世沒於

至正中年七十五自題其墓曰梅花和尚之塔人
怪之曰久當自驗未幾西僧毀掘諸墳疑為緇流
竟免今名梅花里即其故居與埋玉處也詩更清
逸可誦

松石圖

硯池漠漠吐墨汁蒼髯呼風山鬼泣濤聲破夢鐵骨冷
露影濡空翠毛溼徂徠千樹老雲烟湖山九里甘蕭瑟
何當閱此明窗下長對詩人弄寒碧

畫竹

與可畫竹不見竹東坡作詩忘此詩高麗老繭冰雪冷
戲寫歲寒巖壑姿紛紛蒼雪落碧篠謾謾好風扶舊枝
猗猗頭角易變化細聽夜深雷雨時

食菜蘩戲作

菰根繞地翠光濕雪花翻起玉脂泣蕪菁金谷已塵土
美人壯士何顏色山人久刮龜毛氈囊空不貯榆莢錢
屠門大嚼知流涎淡中滋味我所便元修元修今幾年

一笑不直東坡前

題畫

平林方漠漠野水正湯湯蒼莽日欲暮年衰客異鄉草
店自迴合邨路迂更長渡頭人散後漁父正鳴榔

題竹三首

湘妃祠下竹葉葉著秋聲鸞鳳青霄下吹簫坐月明
陰涼生硯池葉葉秋可數東華客夢醒一片江南雨
短梢塵不染密葉影低垂忽起推篷看瀟湘雨過時

青浮山

孤山七十布西東水面奇形獨不同
幾向峻嶒高處望青螺浮在太湖中

畫竹八首

葉葉如聞風有聲盡消塵俗思
全清夜深夢遶湘江曲二十五絃秋月明

愁來白髮三千丈戲寫清風五百竿
幸有穎奴知此意時來几上弄清寒

長憶前朝李薊丘
墨君天下擅風流
百年遺跡留人世
寫破湘潭夢裏秋

春到龍孫滿地生
未曾出土節先成
可憐無箇伶倫眼
鎮日垂垂獨自清

低垂新綠影離離
倚石臨泉一兩枝
憶得昔年今日見
鳳凰池上雨絲絲

動輒長吟靜即思
鏡中漸見髻絲絲
心中有箇不平事
盡寫縱橫竹幾枝

倚雲傍石太縱橫
霜節渾無用世情
若有時人問誰筆
橡林一箇老書生

瀟灑琅玕墨色新
半含風雨半含烟
怪來筆底清如許
老子胸中想渭川

竹林處士陳堯道

堯道字宗遠自號竹林處士嘉興人隱居不仕與
楊維禎等倡和沒於元季有竹林集子約絢繹緝
皆能詩語溪朱志道有喜宗遠復入虛白齋詩云

竹林先生陳夫子白髮鬢鬢垂兩耳著書眼似秋
月明為文思入清冥裏近來學得神仙術欲向山
中食石髓世間自有仙人居何必蓬萊三萬里先
生一去竟莫迴我嘗勸之留不止如何擘破山中
雲却被茅君強招起月泉吟社詩刻內載陳堯道
一首係義烏人存之俟考

松瓢齋為王好問賦

身外纖微皆長物一瓢飲足寄蒼虬壺中日月懸林表

天上匏瓜下礪幽器大從來成濩落時危那復事沉浮
只憂尚渴陶唐化未放先生學許由

挽穆爾古蘇

小范胸中有甲兵檀公身後壞長城大星墜地中軍愴
白馬憑潮霸主傾碧血不隨金石化丹心長貫斗牛明
會稽高與浯溪並誰與磨厓刻姓名

春日田園雜興

見月泉吟社

化日邛田樂春風畊織圖秧肥蚪蚪動桑暗鶉鳩呼罷

社翁分胙占蠶媪得符傍花隨柳處此事不關吾

竹莊人吳瓘

瓘字瑩之隱於嘉興魏塘

今析嘉善

構竹莊居之自號

竹居人善畫梅仲圭題曰吾鄉達竹莊人得逃禪
鼎中一嚙咀之嚼之深有所得寫竹外一枝索拙
作繼和予不能追古人萬一自笑東隣之效顰醜
矣語與詩俱見鐵網珊瑚

余之作梅聊自吟嘯豈在悅人心目適唐明遠求

作寫一枝以贈今置之禹功後何堪依附古
人而圭翁序之復作一詩題於後

逃禪親授寫梅法二百年来徐禹功竹外一枝清絕處
孤山風雪夜濛濛

過布衣宗一

宗一字貫之海鹽當湖人

今析平湖

早喪父獨與母居

至正間張士誠陷姑蘇聞其才遣使迎之以養母
辭尋以兵劫遂負母逃海上欲殺其母乃以身蔽

面中數創賊憐其孝舍而去傭以給食母卒六年
不克葬寢苦服哀不變有白燕巢其室明初事聞
建坊旌之

顧邑城

寄奴王者亦英雄更愛風流老顧榮今日孤城滄海畔
一天紅浪晚來風

附考顧邑一作故邑在乍浦故邑山下顧榮之先勾
踐支庶封此子孫以為姓漢順帝時海鹽縣陷為當
湖移治此山下尋徙馬嘽因名焉宋書劉裕追孫恩
築城於此有驍將盧丘進居城養創按越絕書吳王

伐越敗兵，鵠李大風發，狂日夜不止，車敗馬失，騎士墮死。大船陵居，小船沒水。匹馬啼嗥，事見吳史。夫差駭問子胥，胥曰：「風北來，助我越，必敗。」後人因以馬嗥名其城。云城在海鹽縣東南一百步。水經注曰：「谷水之右有馬罽城，故司鹽都尉吳王濞煮海為鹽于此。」晉咸康七年，移縣治于此。

及山隱人陸容

容字景遠，居崇德及山之北。

今析桐鄉

構來青堂於兩

峰間，吟諷自樂。貝清江遊及山記中云：「訪陸生於

來青而生，以事出其子煮茶來獻，乃啜二甌。

來青堂

我來已過看花時
剛到中秋未是遲
縱使芙蓉零落盡
北窗還有耐寒枝

陳布衣寶生

寶生字彥廉海鹽人父思恭客泉南娶莊氏思恭
賈海而死莊攜孤歸鹽守節寶生少有才名好為
怪體詩兼善繪事與雲間黃子久契密子久每來
必為漬筆點染山水多至二十餘幅題曰大癡道
人為彥廉先生畫體勢大較飛筆走墨山骨峻峻

無事斲法翠微赭脚淡遠濃樹而幅必以淺藍染
空若高穹下冒也後寶生作春草堂於婁上以奉
母遍請名人詩文以傳之又居峽石東山以父溺
海終身不至海上子久來鹽嘗拉之觀濤偕至東
城輒涕泣子久動容亦不看而罷因為作仇海賦
記其事

題石民瞻鶴溪圖

雙鶴翩翩入太清溪流不盡松風聲髯翁筆底有仙路

倩渠更寫芙蓉城

沈孝隱嗣昌

嗣昌字壽康元季居海鹽豐山之南早喪母事父
曲謹父沒勺水不入口者三日既葬構廬其側覆
以編茨障以土垣日匍匐望親塋以泣南臺論薦
官之不就洪武元年卒邑令造廬旌曰孝隱至今
名其居曰孝隱邨

誦離騷經

叢蘭芳芷滿東臯閒步春風讀楚騷忽憶靈均發幽憤
墜厓幾折沈郎腰

俞推官庸

庸字子中號凝清齋嘉興人為平江路推官有惠
政淮兵壓境庸募卒守城郡僚高安等欲竄庸厲
聲曰公等以世臣守大城一旦臨利害先民遁逃
不顧義與恩耶高安持鐵簡擊庸仆地遂開門兵
入執庸置馬下頃之甦以計脫去間道而歸太府

將授以爵辭曰吳門之役吾有死所今日之生出
不幸耳尚負面授他命見天日乎因憤病卒

病起口占

憶昔辭家塞北遊朝來何事怯新秋
牀堆藥裏塵侵几風靜書窗月滿樓
伏檻長鳴憐老驥引杯含淚惜吳鉤
旌旗明滅西城路落日長烟起暮愁

堵無傲討賊獲功任金壇縣尹久別無信作此寄
之

春入椒盤歲復除，故人不寄一行書。
虎頭年少方投筆，鶴髮慈親正倚閭。
鵬鶚雲霄揚羽翮，羆虬壁壘悉丘墟。
大夫出處皆前定，莫向明時較疾徐。

次韻陳伯昂見寄

闕河瑟瑟暗烽烟，矯首遐觀獨悵然。
徒見舟車勞驛使，未聞山澤訪遺賢。
參橫古塞初寒夜，霜滿征衣欲曙天。
自笑儒冠只如此，窮通何必卜筵筭。

至正乙巳五月三日偕鮑恂張翼金綱訪弘道朱

聘君於集賢里弘道出蔣顥所寫翎毛索題

各賦一首

按弘道崇德人明洪武初以明經為御史都邑志皆失載

寒棘幽花野思深
好山無樹著鳴禽
自來春色濃於酒
別有高枝在上林

寄亭棲老陳秀民

秀民字庶子四明人寓居嘉興感化里至正間官
武岡城步巡檢知常熟州張氏時為叅軍入明不
仕自號棲老所著有寄亭集其詩風度邁人綽有

古致當張氏據平江部將呂珍守越秀民與饒介
之在左右一日陳賦詩寄呂有不驚越女之句饒
為書扇詞翰雙絕呂倩人誦罷大怒曰我為主人
血戰守封疆豈愛一女子不忍驚乎見則必殺之
陳基有寄陳庶子叅軍兼簡饒介之郎中詩云楚
天漠漠水迢迢千里懷人不自聊帷幕喜聞延曲
逆行間忝竊事嫖姚江空不採芙蓉寄歲莫唯歌
桂樹招華蓋仙人如借問為言髀肉近多消

送強彥栗歸吳

薊門秋月白城頭夜啼烏城中良家子半是南征夫或
從張都護或屬李輕車道旁別妻子泣下如迸珠自非
英雄具孰使禍亂除戎馬暗中國遊子將何趨君歸慰
父母繫我獨何如

懷古

兔走要離墳狸啼閭閻墓寶劍生土花銀池浴秋露迢
迢郭西門玉輦迷金步

賦得靈巖

吳門有佳氣，靈巖秀而高。扶輿起中天，橫絕望四郊。築宮念吳王，乘舟懷越相。如聞石鼓鳴，不見西施唱。花殘采香逕，木落洞庭波。鹿銜如意舞，鳥合步搖歌。霞邊錦樹明，石上琅玕長。世無赤松子，誰與共長往。金芝餌處士，玉蘭遺使君。煩將滄海月，還照秀峰雲。

題王長史所畫天平龍門圖

月黑山鬼號，蒼龍鬬折角。仙人一掌擎，不令墮深壑。秋

高勢峻層日暮氣慘錯闌干冰柱懸凌亂雪花落路狹
僅通人峰寒不棲鶴王侯天機峻躋攀故盤礴寫作龍
門圖奇氣低五嶽神魚息天池有待風雷作

壬午重九日與郭希仲紀叔維馬希遠飲周景

父晚香堂上紀畫墨菊馬鼓琴既而各賦一章

去年登堂三月三主人置酒澆春衫今年登堂九月九
堂上主人復多酒馬生彈琴紀生畫郭子題詩美如炙
四明狂客醉欲倒菊花插帽秋光好百年節序能幾逢

人生會合何其少人生會少將奈何為君起舞為君歌
歌殘酒盡更須酌莫待他年白髮多

登靈巖

寶殿鬱崔嵬華池頂上開山從太白出水自洞庭來閣
樹聯珠璣巖花照石臺吳王清暑地那得有塵埃

送王紫芝歸天台

誰信丹丘王道士乘風歸去骨毛輕玉芝生處冬猶暖
銀甕開時夜亦明借使夔龍興禮樂也聞巢許薄功名

胡麻流水他年約莫為耽棋不出迎

濠州望古北居庸諸山

古北居庸一望中風沙滿眼亂芙蓉
曦車夜轉崑崙脊華蓋陰移太乙峰
金口水流終到海玉泉雲起又隨龍
兩京形勝今如此可擬秦關百二重

邳州

青山一髮見邳州落日雲迷故國愁
父老空傳黃石在仙人已伴赤松遊
乾坤不信無清氣河水胡為尚濁流

野樹昏鴉棲未定數聲哀角起高樓

湘鄉道中

日暮倦趨山市遠解衣聊復憇巖阿雲迷險道藤穿石
水落懸厓草亂坡木客下時人跡少鷓鴣啼處客愁多
向南言語憑誰辨莫問蠻方事若何

五月九日調軍入綏寧是夜宿風門嶺值雨

五月官軍入不毛重岡複嶺接天高小臣報國寧辭死
大將行兵無乃勞漠漠野烟啼魍魎陰陰山木挂猿猱

二更風雨來關峽自喜挑燈看寶刀

送陸德中赴海鹽知州

陸侯有仙骨晚歲學長生服氣歸元海遊神入太清渴
唯餐玉露飢不飯青精酒後頻看劍愁來即洗纓官情
聊復爾江海一麾輕

園隱為方以常賦

爵祿不在念丘園計已成池虛芸閣靜地闢草堂靈鐵
甕花前灌荆扉柳下局蘭芽含土碧菜甲益畦青襍

春沾雨蘂蔭夜見星避人修稗史教子讀牛經角角雞
登樹翩翩鳥下庭神交陶靖節自喜酒盈罌

西湖竹枝歌

鴛鴦宛在水中央恰似阿儂初嫁郎擲却郎君金彈子
勸郎切莫打鴛鴦

吳中柳枝四首

吳門二月柳如眉誰家女兒歌柳枝歌聲嫋嫋嬌無力
恰如楊柳好腰肢

長洲宮苑草離離中有吳王舊沼池至今二八吳中女
為人歌舞學西施

館娃宮中花似雲館娃宮外酒如春花前把酒花下醉
莫遣春愁惱殺人

姑蘇城邊楊柳絲千絲萬絲垂參差柳絲雖長不禁手
難織迴文錦字詩

周元初來鶴詩

天外誰呼衆鶴來壇前道士本仙才月明遼海通三島

能載飛瓊數往迴

烟波晚棹圖

東林待月月未出
長江走烟波著天
青山回首不可數
幾點白鷗飛過船

陪同同待制遊南城

城南百花開滿洲
城中主人招我遊
急喚吳姬歌小曲
莫令花落起春愁

寄紹興呂左丞

後來江左英賢傳又是淮西保相家見說錦袍酣戰罷
不驚越女采荷花

錢布衣大有

大有字明遠嘉興人始恨詩不工自忽曰杜甫云
讀書破萬卷下筆如有神吾患讀書不多不患作
不工也既而于書無不讀下筆流暢輒與前異楊
鐵崖稱其善學

西湖竹枝詞

淡黃裙子縷金衫長髻垂肩短鳳簪不願燕京嫁官去
花枝草蔓自江南

葉提舉廣居

廣居字居仲嘉興人天資機悟才力絕人與鄉人
張翼劉堪為文字友仕至浙江儒學提舉晚年築
室西泠橋陶情詩酒有自得齋集

題范寬畫卷

范翁作畫絕代無巖壑交錯青珊瑚玉堂仙人妙題品

千載見題如見圖
亂後圖書絕狼藉
奇珍委地無人識
蕭條錦綵世間稀
拂拭墨痕三嘆息

題崔氏友竹卷

瑀芳絕交亦已久
忘形三逕相追攀
高軒時過翠羽蓋
美人或贈青琅玕
清風慎截鳴鳳琯
滄海勿垂釣鰲竿
一朝羣才盡登用
空山無人同歲寒

寄楊鐵崖

聞道西湖載酒還
飛瓊弱翠擁歸鞍
可無私夢登金馬

刺有春聲到玉鸞異國頓消鄉井念小堂新作畫圖看
野人未納彭宣履獨向清溪把釣竿

自題隱居

癭木栽冠鶴斃輕十年塵土厭飄零小山舊隱雲封戶
大藥新成月滿庭丹井夜交龍虎氣碧霄春躡鳳皇翎
西風客舍炎歊淨擬讀琴心內景經

西湖竹枝詞

水長西湖一尺過湖頭狂客奈愁何鯉魚吹浪楊花落

聽得櫓聲歸思多

芝林居士鎬堪

堪字子興嘉興魏塘人

今析嘉善

居王帶隱居讀書工

文詞尤善古隸不習官學以易授徒有芝林集

費烈女吟

永康費氏女年少十八九擇對無可人真心似瓊玖禮
法以防身絲麻常在手至正十七載太歲次丁酉逆賊
從東來旌旗揺北斗三巴數十城皆降不敢後唐姬與

姜氏以漸為賊偶費女涕泗悲勤勤告父母人生棄禮
義猪狗亦何有我身不如賊我死骨不朽夜深盛容飾
自縊後園柳高義感行人痛心而感首平章瑪魯者左
丞韓叔亨低頭雙屈膝拜賊乞餘生不能受白刃空負
朝廷恩茫茫天壤間生死義與仁泰山與鴻毛孩提如
重輕費女生草野烈烈超凡倫二公國柱石棄去如輕
塵芳名與污迹遺戒千百春

擬古

千金買明珠百寶裝帶鉤寶帶綰同心明珠垂兩頭美人結新歡託體相綢繆再拜稱主壽持以奉千秋

題西溪草堂

三尺茅簷壓樹低浮生聊爾作幽棲雖云身外原無地更有青山屬杖藜

陸學士景龍

景龍字德陽號湖峰郡志作景龍誤嘉興人至順己巳舉賢書或曰貢士官明州學正有湖峰稿不

傳詩見元音元詩體要及敦交集詞極弘麗時稱
其工於咏物

題趙松雪人馬圖

閣老風流世所誇
揮毫寫出兩名騶
玉關秋遠風生樹
銀海春深浪蹴花
一代衣冠淪草莽
百年縞素颭風沙
蕭蕭白髮鄞江上
見畫令人重歎嗟

春日遣懷和吳仲圭韻

閒愁日日不能禁
漫賦停雲感寸心
老去一貧何至此

春來多病到如今
門前花飛萬點急
湖上水添三尺深
却喜小樓當綠樹
倚闌時復聽鳴禽

寄上竹深契家以寓懷耿之情

竹深先生清隱處
蓋湖萬頃水雲涼
每聆金玉無來使
時見墳茔有和章
麥熟崆峒思續食
花開杜曲憶傳觴
西齋有客如義獻
為致殷勤意莫忘

奉次見貽詩韻

夏蓋湖頭秋日涼
碧雲遶屋見蒼筤
波光入酒葡萄綠

雨意催詩茵香每羨謝公能曠達也知賀老足清狂
故人已動江湖興擬借扁舟載筆牀

過伏龍山訪諸故舊詩呈竹深老友

江空歲晚賦停雲剪燭西窗話夜分山館無人訪遺叟
驛亭有客送徵君寒梅近水偏饒笑老鶴昂霄自不羣
明日扁舟湖上去棹歌聲裏酒微醺

酒邊話舊情契綢繆見教二詩詞意深至輒步

來韻以呈

隔世相逢白髮長行窩十日坐書香
義熙處士遭衰晉
大厯詩人出盛唐
往事荒涼驚逝水
高情忼慨惜流光
只今故舊多淪落
中夜懷人斷寸腸

百年身世累虛名
一旦炎涼見薄情
溝壑未應甘轉死
干戈已幸得更生
誰家明月能吹竹
何處滄浪可濯纓
但得歲寒心事在
梅花滿把不勝清

畱竹深軒賞雪

曹江三冬雪大作
蓋湖七日冰不開
明月墮空銀漢淺

白雲匝地玉山摧剡溪舉棹無由去
灞岸騎驢或可來
却羨能詩何水部肯延東閣共觀梅

故人重見高誼藹然連日倡酬不已漫賦近體奉

呈

伏龍山色翠如新兵後重來訪所親
喜見芝書徵國士
尚聞蕙帳隱山人文章未信窮為崇
詩句焉能妙入神
慰我梅花窗下酒醉中拍拍滿懷春

奉寄竹深識趣二先生兼簡泉上架閣

下榻徐高士彈琴魏隱君相望一溪水只隔半山雲
每憶朋簪盍俄驚客袂分登樓頻眺遠離思正紛紛

至正庚子三月七日魏處士昆季邀予遊夏蓋湖
憩福原精舍胥會者九人各賦詩一章

石橋流水放蘭舟野水蒼茫涼欲秋山勢截雲橫碧海
波光吞日沒滄洲岑參漢陂客同泛賀老鑑湖誰復遊
醉插花枝爭勸酒尊前一笑歲如流

柳南小隱

參軍家住南湖上楊柳蔭門春水生落日樓臺看洗馬
東風簾幙聽啼鶯長條拂翠陰垂地三月飛花雪滿城
每為論兵來好客傍人錯認亞夫營

楫拙窩

安樂窩中興淡然靈根所得自樵仙地爐伏火春如海
雪屏圍風夜似年香透玉酥和芋撥脂流琥珀帶松燃
絕勝沉水燒金鴨吹徹參差惱醉眠

輓普大夫

英英正氣鍾河岳赫赫高名照古今
七道提綱徒赤手
九泉飲恨只丹心
臺空鳳去秋雲慘
屋冷烏啼夜月沉
珍重遺章猶絕筆
令人一讀淚沾襟

題墨菊

東籬正色本來真
子墨如何強寫神
滿目緇塵非舊日
西風羞見白衣人

題紅梅

昔醉西湖處士家
酒痕吹上水邊花
東風蛺蝶迷香夢

一樹珊瑚月影斜

陸學正德方

德方字顯叔華亭人至正壬午舉人授般陽路學正未幾羣雄蜂起挂冠歸時元平章河南沈照避亂鹽之甘泉鄉德方單貧徒步傭書於其家俄與談經史論時政沈大驚詢知所自遂以女妻之明初以通臣薦不赴嘗為詩題壁云云蔣楚樺輯我郡詩乘謂即陸景龍未知是否姑識之

武原新居題壁

我本由拳人何以寓茲土所恨國步艱一官難安堵
流離坎壈中二天仰恃怙有妻如孟光有翁如彥輔
灌園佐辟纁世事任旁午偶出南陌頭易姓知真主
微服過舊鄉官私迫門戶逃名名愈隨披裘釣溪許
夫豈蹈沉淵臣自甘草莽中冷烹一甌博山燒一炷
彈琴伯牙臺聖世容巢父

聽雪徵君孫固

固字以貞海鹽當湖里人

後析平湖

雅志恬曠長於詞

賦元季不樂仕進讀書顧渚之陽顏其齋曰聽雪

因以自號豫章胡儼為記明初辟署華亭學不赴

與楊鐵崖陶南邨友善所著聽雪齋稿今無傳楊

維禎有聽雪齋詩云老夫聽雪龍門寺浙澁初聞

飄雪多龍噴雨花天作瑞象占雲葉氣生和月明

蟹過銀沙岸風細魚沉玉海波萬籟一空天地在

誰憐聲色老婆娑虞集有聽雪齋詩云樓前宿鷺

起星河近歲江南雪轉多
投老鍾山寒不寐滿山
松竹夜如何陶宗儀有聽雪為孫以貞賦云瑤池
阿母教飛瓊細搗冰花攤佩旌郭索行沙林竹偃
吳蠶食葉紙窗明短編清夜誰家讀柔櫓寒溪遠
處鳴閉戶先生俄側耳松聲沸起煮茶鐺

西湖竹枝

青蓬紙蓋小花桺外湖還向裏湖搖
人心好似西湖水
隔斷中間有六橋

顧教授琛

琛字淵白一作文琛字淵伯嘉興人恃才傲物元季入京獻燕都賦翰長元公復初不喜曰今大朝四海一統六合一家燕蓋昔時戰國名何燕之稱慙恨而歸晚年始得領教岳陽高照庵以詩送之云豪氣欲吞天下士冷官初到岳陽城時杜清碧本應召次錢塘諸儒者爭趨其門琛作詩嘲之有紫藤帽子高麗靴處士門前當集賽之句聞者傳

以為笑用紫色襖藤縛帽而製靴作高麗國樣皆
一時所尚集賽則內府執役者之譯語也一日訪
僧勝福閒遊市井間見婦女皆濃粧問從行者知
為僧之寵下此則道人所有遂戲題一絕於壁僧
亟去之已盛傳矣其狂致如此

遊昭亭

我出苦無騎清晨僂輿探幽得微逕去郭十里餘層
巒拱金碧云是神靈居羈禽叫秋樹旌雲散晴墟懷哉

昔太守曾此持麾旂拂石訪遺跡默然步踟躕非無歸
隱心茲焉托吾廬壯圖一未遂安能罷馳驅

題錢舜舉畫漁翁牽罾圖

苔溪道人溪上居一生只慣觀打漁吳兒打魚當畊織
意匠別出絲綸餘緯葭縛竹直水口承以密罟防其遁
卒然一掣勢莫禦紫鱗躍出金芙蓉蓬窗牖戶色色具
茶瓶酒椀尋常俱船頭青山立突兀船後綠樹搖扶疎
人間名利不可汚烟水為蓆天為廬西塞山前晚風急

醉踏船舷浪花入漁翁心事道人知日暮來看倚筇立
回頭却捉秋兔豪寫入生綃半猶溼令人展卷心茫然
辛苦微官悔何及吳淞江上鱸魚肥秋風落葉滿漁磯
何不買舟逕東歸何不買舟逕東歸

建平道中遇雪

北風如弦雪如箭來射長途旅人面黑雲匝道天為愁
四望羣峰白於練蕭條聚落纔百家日暮青烟起山縣
荒林叢葦人少行斷雁殘鴉有時見憶昨年少輕遠遊

曾跨驊騮走畿甸只今潦倒困微官馬上徘徊發哀憤
丈夫事業未易論但怪流光速飛電便須大飲敵清寒
未用悲吟歎羈賤

戲題

紅紅白白好花枝盡被山僧折取歸祇有野薇顏色淺
也來鉤惹道人衣

俞平江俊

俊字子俊號雲東庸之子弱冠從顧淵白遊頗得

其習負氣凌鑠當巴延太師柄國日嘗賦清平樂
長短句曰君恩如草秋至還枯槁落落殘星猶弄
曉豪傑消磨盡了放開湖海襟懷休教鷗鷺驚猜
我是江南倦客等閒容易安排手稿留葉起之處
後與葉交惡竟訴于官必欲構成其罪得以賂免
初仕麗水巡檢張氏據姑蘇改判平江娶顧森布
哈次兄超爾女徙居海上入明出處未詳

嘆息

百年同轉燭五十始知非老病侵腰脅浮名苦馬韉
門羅可設今雨客還稀空羨茅堂燕翩翩傍母飛

楚州夜泊

漏鼓聲頻欲四更野航燈火對愁明城頭楚語驚鄉夢
船尾吳歌動客情漠漠水雲隨雁度瀟瀟風雨自鷄鳴
離情遠道何嗟及未必江湖老此生

次高原朴見寄

年少簪花壓帽簷飛觴走筆競春纖空餘老淚青衫濕

遮莫新愁白髮添生計有涯蠶上箔公庭無事鳥窺簾
昔人漫說揚州鶴好事從來豈得兼

渡江

鵬月六日狼山北浪花如雪勢吞舟隔江隱隱聞吳語
去國遑遑學楚囚白髮慈親初屬望青衫倦客不勝愁
幸存杜曲桑麻地敢望班超萬里侯

橋李詩繫卷四

欽定四庫全書

攜李詩繫卷五

平湖沈季友編

元

董處士性存

性存名成一字自明嘉興人居胥山鄉世雄于貲
好施予人稱長者讀書不仕子良用良史皆穎敏
好學治春秋會稽楊廉夫避地松江後進多從之

遊性存因徙家上海令二子往學焉聲譽大起明
初二子俱貴性存年八十餘不廢吟咏一夕夢入
帝閭闔門明旦無疾卒歸塋勸善鄉

贈楊山居太史

曾懷荆璞詣天關雨露恩深賜珮環玉筍遙班躋鳳沼
金閨通籍侍龍顏尚書聽履星辰上太史蜚聲翰墨間
厭值承明耽隱興錦袍光彩照湖山

送俞子俊麗水巡檢

爲官當作執金吾膝上須橫丈二父會見黑頭驚獬豸
試看赤手縛於菟醉歌擊碎玉如意行獵射空金僕姑
眼底狂飈俱掃迹胸中有策致唐虞

弁山小隱黃玠

玠字伯成金華人少見知於趙孟頫黃潛有詩名

元季客於顧玉山隨父正孫移家嘉興魏塘

後析嘉善

釋雪廬有訓伯成絕句云詩成嘗共野夫題新構
茅堂水郭西是也平生慕郭林宗陶淵明之風不

害儲蓄有輒貸人晚值兵亂益貧困後樂吳興山
永之勝卜築弁山號弁山小隱父死仍歸魏塘塋
於陸莊

碧瀾妾歌

切切重切切女蘿附木風吹折中情繚繞了弗離聽我
長歌碧瀾妾碧瀾亦是諸王孫世殊事異老且貧少陵
尚惜爲奴者況是當時真貴人春衣典盡春寒悄二妾
朱顏正姝好忍將羅帶折同心懊恨浮生頭白早珠鈿

翠靨幸僅存此時猶及嫁夫君十二樓頭燕子去揮手
不可留仙裙去妾相悲兩相約既去猶煩送肴酌主君
詎忍覆棄之見此反令心緒惡一心事天天亦知忍著
主衣還事誰遂移衾襪與俱返後君死者常爲尼碧瀾
堂下雙溪水使客往來豈知此不願新恩戀舊恩千萬
人中兩人耳

題郭天錫畫卷

門外馬蹄三尺塵屋底青山看白雲不知身世在城市

但覺爽氣吹冠巾
鳴甯灘頭露沙渚
彷彿西陵與漁浦
惱人歸興滿江東
烟樹半沉天欲雨

題顧仲瑛書畫舫

扣舷擊節起歌鳴
一榻橫舟小結廬
篆籀古文三代上
丹青妙手六朝初
虹光貫月夜將半
江影涵秋涼有餘
零落宣和舊時譜
無情汴水正愁予

柳塘春為顧仲瑛賦

江南二月柳條青
柳下陂塘取次行
蘭杜吹香魚隊樂

草莎成罽馬蹄輕小蠻多恨身今老張緒少年春有情
得似東吳顧文學風前雨後聽鶯聲

俞子照漁溪隱居

遠結郊居帶水流滿川雲日弄漁舟魴魚何事歌鰾尾
鷗鳥多情笑白頭拔足風塵雙蠟屐全身天地一羊裘
武陵亦是人間世只見桃花不見愁

湖光山色樓

山色湖光樓上頭闌干十二古今秋一川碧浪與天遠

滿地白雲如水流往事但聞吳苑在幽人多愛習池遊
長年風景尋常好日日芳筵爛不收

釣月軒

林頭書簾似簦簞漁父滄浪寄此生臨水卜居聊遠俗
垂竿欲下已忘情斯時我自知魚樂今夜誰同看月明
千古羊裘一男子不貪祿位得真名

與賀九成知事

風流江左人何似猶有清狂賀季真早乞鑑湖為道士

肯呼太白作仙人珠簾遠對鷗邊雨玉塵高吟馬上春
最想若耶溪水綠幾時同戴小烏巾

山居迴文

萋萋草帶書窗碧瘦竹輕藤引客看栖鶴伴霞歸岫晚
斷雲拖雨過江寒畦分暗水池亭小石帶幽光野館殘
西崦松林通境窈共君邀月對琴彈

彥明王先生為予言瞿慧夫且出示張伯雨李五
峯所贈言為賦此詩

聞說瞿文學與交皆偉人曹劉不可作張李故相親已
蛻塵中鞅猶存席上珍才名元振厲詩語特清真顧我
生何晚思君妙絕倫平生五經笥他日半通綸小試衣
冠掾終期科第臣芝蘭居輒化薑桂久逾辛孟浩吟祇
苦虞翻相本屯風雲同律呂時序異參辰有恨月初夕
無言草自春能忘正云晤搔首暮江津

四時詞二首

酒醒簾外日三竿陌上晴泥苦未乾人在花深聞笑語

黃金小碾試龍團

右春

水碧湘筠浪織成粉藍輕縠小帷屏侍兒生怪風吹夢
故傍牀頭落剪聲

右夏

梅花

夢散羅浮清夜長銀絲挂燭雪生香人間那得量珠斛
合與東風聘海棠

黃秀才魯德

魯德嘉興魏塘人

後析
嘉善

元末老儒有詩才邑景多

其題咏善鍼灸無嗣門人徐中得其學雲間邵復
孺有簡黃魯德秀才詩云洛下衣冠遠莫追城南
韋杜本同時江山風景今何似湖海襟懷自有期
近况俱題鸚鵡賦舊情猶托杜鵑詩蘭舟夢遶清
溪曲杜若花開白晝遲

亂後經瓶山

考見
題咏

東西十里一廛無三五行人只露居惟有瓶山銀杏樹
至今猶發斧斤餘

武塘十詠

景德泉

幽澗逵引曹溪水此是人間第幾泉一吸清涼除熱惱
不妨頻候煮茶烟

大勝塔

高標千尺插晴空俯仰人寰一氣中終日無風鈴自語
不知火起梵王宮

附考寺在嘉善治東唐天寶建寺前有橋曰大勝橋

慈雲寺

唐朝古寺已千年鐵騎來時火歟燃殿閣尚存遺跡在
何期一夜逐風烟

附考在嘉善治北三

國時建唐名保安院

胥山

百里平田擁翠堆山人傳是伍胥來劍痕猶帶英雄氣
白日雲深鎖綠苔

鳳凰墩

荒丘空得鳳凰名
歲歲春來宿草青
雨洗燒痕含殺氣
簫韶九奏想虞廷

附考在嘉善治東

永安鄉舊蒲涇

陳賢良墓

河水東流繞九墩
至今不解識真墳
白牛曾踏風涇路
故老時時說隱君

附考墓在嘉善

縣東南七里

吳氏義塾

兒童父老尚絃歌共感吳門惠澤多今日文風俱掃地
盡拋禮樂事干戈

附考在嘉善元吳森捐田二頃建義塾至大中應訪使以聞表曰義士

愛山花園

削除荆棘創高臺萬紫千紅二月開日日笙歌樓上醉
不知寒雨鎖荒苔

附考在嘉善元萬戶陳景純園內有愛山亭雪月樓置書畫玩器亭樹七十二以延四方之士

吳瑩竹莊

千尺高榆繞竹莊清風亭上蕩花香如何一旦遭兵燹
荒草寒烟怨夕陽

附考莊在嘉善城內
元吳瓘所開名竹莊

吳仲圭墓

老子平生學薊丘晚年筆法似湖州畫圖自寫梅花號
荒草空存土一坏

附考墓在嘉善城內花
園街之右有橡林今廢

蔡景傳

鐵網珊瑚清河書畫舫二書俱有元人嘉興蔡景

傳詩

題袁安卧雪圖

陰風響枯梢凍雪埋老屋深逕斷行蹤除道乏童僕閉
門事高枕政爾清寐熟誰與排戶入停馬駐車軸問知
是令君冷語無欺曲卿去我欲眠毋煩責空谷升車首
重回欲餉不敢瀆移書舉孝廉庶以激頽俗後來立朝
端諤諤爭楚獄方其高卧時何意萬鍾祿令君非素交

此舉真巨目范史良已羞姓名忘紀錄邵公有裔孫眉
宇清可掬茗仙贈此圖筆駛意自足老氣近古作冷光
淡朝旭當以淨眼觀那許汗手觸平生冰雪心展玩亦
三沐

題趙子固墨蘭

靈均楚同姓子固宋宗臣秋色淒九畹墨香垂百春蕭
閒入神品爛漫見天真此趣誰能會烟霞物外人

張顥

題詩亦見鐵網珊瑚

題梅道人畫墨菜圖

只宜滋淡泊安足奉膏粱食肉非無辱何如此味長

沈進士庭珪

庭珪字德璋鐵網珊瑚載破窗圖詩有庭珪一作
後見吾邑陸芝房記元登科者沈庭珪係至正十
三年舉人二十三年進士志俱失載

題破窗風雨圖

劉君性嗜學孜孜事三餘孤燈破窗下簡編自卷舒蕭
蕭風雨來吾伊聲自如安貧人所難味道心常愉我聞
顏子淵簞瓢陋巷居千載稱亞聖聲價重璠璣又聞陶
淵明所處亦敝廬蕭然環堵間左右惟圖書吁嗟世之
人性樂耳目娛華居美飲食所務安其軀良心日以斲
疇能返厥初勗哉劉孝廉聖賢以爲徒

玉山主人顧瑛

瑛字仲瑛別名阿瑛自稱金粟道人崑山人元季

辟會稽教諭不就築室苕涇曰玉山佳處園池聲
妓之盛甲於一時招致海內名士置酒賦詩張士
誠入吳遂跡隱嘉興之合溪營別業居之釋來
復有寄題合溪別業次韻詩云草堂合溪上雲石
靜無氛春水鱸三尺秋風鶴一羣行厨依竹見吹
笛隔花聞最喜逃禪好蒲團擬共分不食諸侯祿
閒居避俗氛岼花紅作陣沙鳥白爲羣貝葉風前
讀淩歌月下聞清遊難再得愁絕一江分陳基有

寄仲瑛寓嘉興詩云每憶吳門顧辟疆舊開池館
帶滄浪綠波芳草盟鷗鷺錦瑟玉笙悲鳳皇座客
詩成誰最好故人酒後我多狂扁舟獨往鴛湖上
老到猶能賦草堂瑛以子元臣封錢塘縣男明洪
武元年徙臨濠卒自爲壙志戒其子以紵衣桐帽
椶鞋布襪纏裹入土歸葬綽墩按瑛所著詩曰玉
山璞稿又輯交遊諸公詩四十家曰草堂雅集有
萃亭館題詠曰玉山名勝集外又有玉山紀遊集

在合溪有暮雲集今多遺軼

玉山中亭館拆毀殆盡僅留一草堂耳今于嘉興

合溪營一別業頗幽寂因賦五言一首

我愛新居好蕭然絕世氛
路回青草岸水合白鵝羣
野色排簷入書聲隔竹聞
是中多野趣難許俗人分

夜宿三塢次陳元朗韻

水落南湖不露沙又牽舫子到僧家
春浮大斗娟娟酒寒隔虛樵薄薄紗
半夜檐鈴傳梵語一林江月照梅花

坐來詩句生枯吻
指點銀瓶索煮茶

次韻劉孝章治中邀夏仲信郎中遊永安湖二首

考見
題詠

金粟寺中公廨靜白書事閒如治蒲沙棠爲舟穩可泛
郎官之湖今豈無啄花鶯坐水楊柳雪藕人歌山鷓鴣
日西上馬踏歸路小隊高呵驚道吾

湖上筵開張水戲掩幔涼風吹短蒲大魚聽樂浪頭出
小艇賣花城內無丙鼎庚庚識饕餮甲煎斑斑炙鷓鴣

酒酣賦詩動海內
覩紙楷書能寄吾

次蒲菴長老三首

鴛鴦湖上住三年
每憶僧中有皎然
路遠夢憑蝴蝶去
江空信斷鯉魚傳
問人盡說山藏寺
卓錫應知地湧泉
未得青鞵滄海上
燒香來看散花筵

無官身似一絲輕
閒却胸中十萬兵
爲愛淵明能入社
獨憐靈運不逃名
敲門看竹題詩遍
煮石煎茶汲水清
廷尉崔羅今可設
死生誰復見交情

神山處處產神芝，獨有神仙不可期。
賈誼過秦曾著論，息躬絕命亦攜詞。
千秋離合雌雄劍，一著輸贏黑白棋。
多少英雄皆鬼錄，天年全付病支離。

乙未和孟天暉

婁上人家不識春，檐頭蛛網亦生塵。
朱門桃李皆零落，只有東風未嫁人。

題趙子昂畫楚江春曉

東方旭日出曠曠，照見巴江曲。
似弓莫遣猿聲到巫峽。

山頭猶有楚王宮

捕魚圖

磯頭新水三尺增
漁翁兩船攀一罾
大魚跳波撥刺去
只隔蘆花喚不應

西溪先生鮑恂

恂字仲孚崇德人元統間三領浙元歷平江教授
至正甲申至元癸巳皆入闡校士學士張翥御史
劉彥博薦入翰林不就嘗居千金梧桐二鄉後復

卜居郡之西溪耕桑自樂自號環中老人迨明洪武初禮部主事劉庸舉吉安余銓高郵張長年及恂皆明經老儒達於治體可備顧問遣使召至京時年八十餘上見之大悅命爲文華殿大學士以老疾辭諭曰朕以卿年高德劭故授此職煩輔導東宮耳免卿早朝日晏而入不爾當從卿志恂復固辭遂賜敕放還與貝清江程柳莊結社講道學者稱西溪先生爲人慎重不可狎而學與行名天

下少嘗受易於臨川吳草廬著大易傳義詩文有

西溪漫稿

龍眼池

考見
題詠

寶地多奇跡雙池鑿龍眼秋光涵遠空寒波應靈響陰
雲翳或結夜月晴更朗對此長湛然虛心自蕭爽

題吳仲圭平遠圖

蒼山遙遙幾千里綠樹參差碧烟起雙帆忽從江上歸
影落斜陽溼秋水林陰蒼莽鳥不飛石徑蹭蹬行人稀

松根似可縛茆屋沙尾亦足容漁磯我曾西遊倚江閣
極目長空入寥廓好山不肯過江來恨不乘風跨黃鶴
吳君畫手當代無落筆何年成此圖安能著我巖壑底
相覓老樵尋釣徒

次韻贈李煥章

輟棹清谿曲題詩畫閣幽晴雲松上過暗水竹間流把
飯時驚鶴持杯不連鷗出門塵滿眼於此且淹留

次竹林先生中秋玩月作三首

昔年爲作蟾宮客曾向宮中看月輪萬丈光縣金粟樹
三更影落絳河津生憎老兔深爲窟却笑仙娥不嫁人
回首歸來舊塵世滿天風露一吟身

數年不對中秋月月色依然不負秋嬾問仙人修玉樹
且陪帝子上瓊樓斗牛低繞天樞轉河漢斜橫左界流
却望蓬萊宮闕遠幾隨清影重回頭

浪說今宵明月好干戈滿地幾人看惟餘院落清尊賞
恐照沙場白骨寒采筆寫殘思縛兔玉笙吹罷擬乘鸞

知君此會非忘世只爲良辰一笑難

除夕

絳蠟高烧爆竹鳴羣兒奔走喜還驚老夫識得春來慣
自伴梅花睡到明

趙彥微畫二首

昔在茗花谿上住繞溪山色滿高樓別來十載看圖畫
山自青青我白頭

吳興孫子多才俊曾把文章動九關歸到江南塵滿眼

金少卿集卷五
忍將情思寫青山

盛叔章畫

煙溼空林翠靄飄
渚花汀艸共蕭蕭
仙家應在雲深處
只許人來到石橋

王綸

綸字爵無攷鐵網珊瑚有嘉興王綸題梅道人畫
策一絕郡志載其柳橋漁唱詩而景德倡和綸亦
與焉固當時一詩人也

水深歎

至正十年夏四月戊戌吉皇帝詔四方夙夜靡暇逸興
利興除害守令宜怵怵江南水深蕩租稅無所出官府
議除豁生民務存恤松江素汙下川陌流汨汨惜哉郡
太守民情固沉匿茫茫修竹鄉卑溼難具述只如來字
圓積滂恒數尺歸附八十年未始睹穎粟胡爲吝一言
歲糜六百石省憲雖至明蔽隱不容詰嗚呼皇天后土
皆白日何獨使我寘此幽暗室有食不令充我饑有藥

那得療我疾。皂胥自此從隳突。妻子何時免。啾唧繫太
守。兮民之父母。盍自省兮。爾俸爾秩。縱然民命不爾憂
奚爲王言。棄如嫉。九重閭闔。雖深密。民瘼民寃。極纖悉
爾居郡縣。親目擊。恐聽咨嗟。起蓬華。巨泖崩隄。滙爲一
雨。不崇朝。先汎濫。荒蒲衰葦。風瑟瑟。爾亦何難究其寔
培民聚歛。非仁術。財聚民離。果誰失。欺君不容誅。戕民
有常律。我民一何苦。爾見一何執。君恩寬厚。難再得。再
拜仰天長太息。

柳橋漁唱二首

考見
題詠

楊柳青白鷗不來烟水昏落日乘風放船去顛倒醉眼
包乾坤君不聞西家急科糴東家重築城越上良田無
主尋我漁歌發今君爾聽黃金何似一絲輕

楊柳黃秋風一夜蘆花鄉漁釣靜忘周日月公卿不換
漢桐江君不聞大官呼領兵小官亦戎行天涯歲月多
風霜我漁載歌兮情慨慷鑑湖容借賀生狂

常山長真

真字爵無考徐一夔於洪武十二年有祭宣公書
院山長常先生文詩見至正倡和集又於金蘭集
中得七律一首題曰南宮常真

題徐良夫遂幽軒

萬山深處著柴門窗下流泉屋後邛稭藉耕漁資活計
不縈聲利競晨昏松陰鬱翠林藏雨桂子飛香月滿軒
世事無勞相問及嗟餘還共倒芳樽

周山長致堯

致堯字煥丈初名裴先世來自四明居崇德州石
門鎮致堯生極穎異讀書一二過不遺嘗爲宣公
書院山長明洪武初與薦辟不就歸隱梨林著有
石門集淮海秦約序之稱其詩不事雕飾特以雅
致爲佳云

述懷

平居遠塵市畏觸憂患端矧茲值多故而敢懷自安寄
身途旅中戚戚苦饑寒爲生恥無庸緝遺守微官雖云

匪多秩所職期可觀顧非周圓器執事仍獨難塞予亦何爲俛仰徒長歎

修禊日偕曹廣文七人遊南湖賦得裴休舊業
休字公美捨宅為寺今真如寺是也

幽賞殊未窮揚舲濟南湖載瞻裴公宇蕭條乃禪居緬思太和季秩班百僚初晚懷超俗緣息心究空虛歲月既云邁世事亦已徂我我清暉堂遺構委榛蕪斯人不可作慨傷獨在予

甲辰九日東塲登高分得竝字

東往有高塲名與福城竝九日陪諸賢登臨期絕頂秋
深木葉落不覺天地迴涼颼灑林霏咫尺衣裳冷玉田
好開懷何止供香茗幽軒賞佳菊竟夕忘酩酊昔人晝
遊此衣錦寧尚裝寥寥千載間視若空華等清境素情
愜塵心未全屏感彼興我懷鈎詩記深省

夏夜宿流虹寺有感

馳驚竟朝莫似緣饑凍迫如何百年間區區爲形役世

途寡相知覲顏徒自飾所獲既非寶所喪良可惜生理
固忡忡進退量我力豈乏希世榮前車已當阨流光慙
奔馬素業紛斷織大道卒未聞怛焉增內惕

附考寺在府治東北二百步宋李宗生於丞廳後
改爲興聖寺御書流虹聖地今廢爲嘉興縣學

雨夜感懷二首

卧聞窗間雨瀟颯夜將深轉對壁上燈依微照孤衾撫
茲淒絕候况感遲暮心早起視明鏡白髮應滿簪

攬衣起中夜感歎成嘯歌百年事形骸所得良不多生

理既茫昧動靜虞網羅歸哉南山陲石田蔭松柯

題俞仲剛山水

我昔四明尋隱者著屐遠過玉几山巖扉苔逕轉森邃
結窩乃在雲松間松間迴風蕩空影水流花開春日永
芴服涼深團扇開好鳥飛來意俱靜為覓漁梁白沙步
因識樵人弈棋處扁舟暝泊碧溪陰沿月長歌下山去
東帶十年事朝謁鶴怨猿驚總淒切草堂晴晝玩新圖
三嘆令人愁欲絕

西谿訪鮑先生

谿上齋居好幽偏，事不侵桑麻存晚計。
圖史樂初心，岸憤幽窗晚移牀。
綠樹陰下隣，何待老從此數相尋。

送崇德州夏同知

慷慨持征節，雄談思戰塵。
有生皆帝力，無地不王臣。
為國丹心在，論功白髮新。
他年忠義傳，端合繼前人。

次石監征韻

憶子臨東海，征帆幾日回。
鼙鳴津鼓合，蜃起石樓開。
官

酒應深酌春衣或未裁
題詩記遊歷時寄到蓬萊

寄道士胡尚惠

綠草芊芊碧樹斜
清涼琳館即仙家
養生不餌千金藥
對客時分五色瓜
池上雨來飛赤鯉
林間月出見金蟬
顧予顏色渾如雪
曾記松西汲井花

寄沂陽劉廷鎮負外

故人相與最從容
尚憶論詩向夜中
白首無家十年別
青山何處一尊同
夢回孤館鐙前雨
目斷西風塞外鴻

誰識離懷愁絕處野亭依舊穆陵東

吳中

兩岸春雲暗柳條滿蓬風雨過楓橋空憐越絕溪山好
且聽吳趨巷陌遙官舍晚涼飛燕子水鄉人靜賣魚苗
誰家白晳佳公子賸把黃金買阿嬌

登崇德州城有感

溪上孤城百雉餘城門猶自護儲胥灞陵空宿將軍騎
范叔應隨使者車雖犬蕭條兵過後漁樵散漫市休初

老年觸事多成感閒向芭蕉葉上書

寄舍弟鼎

生計依人轉寂寥別來心事向誰消鏡中華髮隨年改
谿上青山入夢遥對酒便思歸白社將書不敢寄洪喬
越情吳思渾無賴獨寄江樓送暮潮

臨平道中寄京師諸友

雲外羣山綰翠螺馬蹄長是客中過關河樹色秋光近
驛路蟬聲晚更多千古心期空皓首百年人事等滄波

自慙薄劣頻趨走幾度因風想玉珂

春日雨中漫成次韻

十日春泥懶入城滿湖風雨未開晴
草堂欲補寧忘陋沙鳥頻來莫漫驚
橋外柳條隨意綠坐間苔色傍人生
緣知花事渾能幾好買芳尊對客傾

寄劉孝章經歷

意氣傾人記昔年東風飛蓋日翩翩
花明古戍春停騎月上清江夜放船
老去交遊誰更健亂來蹤跡總堪憐

山光水色渾無賴，却數冥鴻野外天。

次韻送陳壽大之湖州

識君雖早送君遲，却愧相看在亂離。
十口一家無別業，此身何日是閒時。
青山滿路春船酒，白日空江客枕詩。
我有好懷誰得共，鷗波千頃雨絲絲。

蔣氏小瀛洲

并引

漁石先生營室雲塘之間，水竹翳翳幽偏絕塵讀書。
養道致足樂也。楊鐵史頗之曰：小瀛洲至正壬寅秋。

七月子曾一至其處迄今九年所矣適晤其令子文質知先生無恙為賦一首奉呈

茫茫人海小瀛洲靈州丰茸碧樹幽底用風輪通弱水
時逢雲袂下浮丘天陰圖畫龍鱗涇月下吹簫鶴背秋
我亦平生有仙骨歸來同作采真遊

寄吳興張別駕

鴛鴦飛去潦波平曾聽驪歌憶送行南浦移舟官樹綠
野亭酌酒晚風晴異鄉春近多新夢遠使書回足舊情

欲識懷君無限意滿庭芳樹亂啼鶯

西津夜泊

孤帆夜落石橋西橋外青山入會稽
卧聽海潮吹地轉起看江月向人低
一春衰謝憐皮骨萬國艱虞厭鼓鼙
何處客船歌水調令人歸思益悽迷

次韻顧玉山寄張子潤

險宦何殊闕九淵且將蕭散事餘年
風前白苧裁春服花外青藜挂酒錢
聖世敢云輕紱冕野人端合老林泉

養生况有封囊藥坐聽流鶯手自圓

次韻顧玉山見寄

郭外茅堂隱者居竹寒沙碧映窗虛
畬田黍熟盈尊酒溪女船回滿七魚
別業定行中使畫佳兒亦拜撫軍除
百年人世多馳逐玉塵清風獨晏如

春日偕玉山泛舟平家湖訪石仲德次韻

湖上春光生綠波湖頭柳色似新鵝
已知出郭塵喧少更喜臨流樂事多
穩坐蘭舟勝上馬新裁苧服不須羅

節堂只隔東西溪隨意相從載酒過

謝劉經歷惠歷

鳳曆新頒自九天故人相寄感相憐極知帝德符三統
共喜春王正八埏海舶遠歸占上日野夫多病惜流年
老妻不解歸來意數問臨官在幾篇

琦元璞所藏趙子昂馬圖

進馭歸來日未西落花芳草滿池泥也知櫪上無凡馬
牽過天閑不肯嘶

苧邨

鳬雁人家春水多
淡煙疎雨暗漁蓑
分明記得南塘路
船尾吹來白苧歌

附考嘉興城南

一里有白苧鄉

卓教授成大

成大字器之其先閩人知平江吳縣值宋亡遂畱

居嘉興之贊溪

後析嘉善

迨成四大世矣至正中爲府

學教授嘗創荔軒以寓思鄉之意徐一夔爲記而

傳之

荔軒

進不得看長安花退不得擘家山荔先人之言何其悲
援筆聊題此軒記

鮮于典簿樞

樞字伯機漁陽人中歲始刻苦讀書因號困學遂
善詞翰工行草虞集云漁陽吳興巴西翰墨擅一
代謂樞與趙孟頫鄧文原也樞嘗於廢圃中得怪

松一株移植之呼爲支離叟朝夕撫翫溫日觀至其家醉即抱之或歌或泣又嘗愛一蠻獅水滴乃漢物也偶墜其吸子於西湖水閣百計求之不得既他往三年復來忽獲於水中以爲神一時詩人多咏其事時浙省廣濟庫歲以富戶司出納侵用官資者府判王某輒拘其妻子以小舟載之西湖趣逐遊人收其姦錢納官樞因作湖邊曲云湖邊蕩漿誰家女綠慘紅愁羞不語低回忍淚傍郎船

貪得金錢強歌舞玉壺美酒不消憂魚腹熊蹯棄
如土陽臺夢短去匆匆鴛鴦生寒愁日暮安得義
士擲千金坐令桑濮歌行露予閱顧玉山草堂集
秋華亭扁聯係樞所書自署攜李當亦流寓吾木
故爲入之

感寓

春風吹綠波淡蕩洛陽柳高樓語錦瑟落花泛樽酒何
人白鼻騮蒙茸紫貂袖一字或未識銀章懸兩肘煌煌

貝宮珠迺落絡蕭手誰知艸玄者窮巷閉白首

退宮人引

駝絨繡帽紅顴頰素髮微連細紗結出宮嫁作海商妻
裙腰尚帶河西褶少年十五二十時中宮教得行步齊
春羅夜剪綉花帖堦前夜舞高變麗寵姬當前翠衿小
便覺中原美人少金蓮斜抱捧珠龍玉籠倒挂收香鳥
年年宮中春日長小車銀甕蒲萄香香殿吹簫鳳皇語
一日再宴諸侯王舞困樓蘭過三十內家別選蛾眉入

雖名伴送半無家旋賣珠環問親戚一爲商婦始自憐
十年不見回番船年多不記教坊曲時時尋撥相思絃

遊智者寺

四圍松是祇園樹三面山開舍衛城遊子心隨仙境化
老禪詩似石根清幾人邂逅有今日半載趙趙成此行
安得盡拋身外事長年來此學無生

靜慧寺四首

寂寂僧房半夢中蕭蕭修竹四山風惟應門外蒼髯叟

解亂僊州禿鬚翁

晚雨纔收日已西
石梁沙路淨無泥
清泉瀉瀉千峰迴
綠柳陰陰一鳥啼

壞壁蒼蒼上綠苔
籠沙無復護塵埃
只應枉駕遊山處
總爲坡仙寶墨來

學道當知髓與皮
聖門壺奧要探窺
十年來往臨平道
半信山中有許奇

戲題廣嚴僧房壁

幾年門外策征騾不料能來共一龕壁上未須書歲月
褚河南是護伽藍

薛相士如鑑

如鑑嘉興永安鄉人

後析嘉善

挾相術游江湖一時名

士多與交往楊廉夫有詩贈之曰銅之鑑僅以見
妍媸不若書之鑑可以見是非又不若人之爲鑑
可以見善惡之端禍福之機河東薛相士自稱老
鑑師一雙神瞳秋水碧三寸長舌霹靂飛曾相水

邊遺嬰作貴子道上擔丁爲富兒前年山東睡漢
是龍虎今年雁山處士非熊羆談言一一中予奪
無依違見子勸以孝見父勸以慈見臣勸以忠藻
鑑道如此頗近古教規鐵笛道人學讀書與詩誤
蒙進士賜緋衣龍門上客一日連十年不調官何
遲吳門相見談出處許我再覲黃金墀我心自鑑
復自斷子卿唐舉無容知醉來吹笛客且去天青
月在梨花枝子月鑑孫鑑心白雲秋蟾皆能世其

術廉夫又有秀州相士歌叙曰秀州相士薛氏見
心者拜予湖上手出句曲外史自贊一首及縹冊
一帖且傳其言云持此以見梅花道人道人技癢
當爲汝歌歌訖然後乞其奇文章余爲畫然大笑
既爲賦歌詩一解又如其意書梅花道人傳一通
俾東歸以復外史其詩曰秀州相士薛見心重湖
風雨來相見手把茅山道士詩亦有胡僧寫東絹
自云膝不拜公卿海內名人初入卷縹綾方冊錦

盤囊首錄梅花道人傳道人
不讀姑布書兩目看
天走青電梅花忽露太極心
南枝北枝開一遍秀
州相士亦識道一笑求心符
鐵券章生不相一隻
眼桑生不相一尺面貌如削
瓜帝治開背如植鰭
王業建君不見漢家將軍如
牯腰午夜臍燈照悲
言又高啟亦有至正辛丑嘉
禾相士薛月鑑過余
求詩因贈云我少喜功名輕
事勇且狂顧影每自
奇磊落七尺長要將二三策
爲君致時康公卿可

俯拾豈數尚書郎回頭幾何年突兀漸老蒼始圖
竟無成艱險嗟備嘗歸來省昨非我耕婦自桑杼
木野田間高歌誦虞唐薛生遠拏舟訪我南渚旁
自言解相人視子難久藏腦後骨已隆眉間氣初
黃我起前謝生弛弓嬾復張請看近時人躍馬富
貴場非才冒權寵湏臾竟披猖鼎食復鼎烹主父
世共傷安居保常分爲計豈不良願生無多言妄
念吾已忘

奉詔句曲外史

繡簇花攢百幅新
故應重喚謫仙人
靈臺一霎交梨熟
漫向峰頭拜七真

濮隱士允中

允中字樂閒
崇德梧桐鄉人
濮氏自著作郎雲翔
從宋南渡
占籍於此
遂名濮院
元大德中有濮鑑
字明之
封寧遠將軍
允中豐於資嘗以中統鈔一
千錠買歌兒汪佛奴
姿色秀麗
一日飲桂花下佛

奴奉觴允中曰我非久人世者汝將奈何佛奴垂
泣誓無二志允中死佛奴獨居尼寺潔身以終事
見輟耕錄元末浙西歲有詩社允中集一時名士
吳毅輩爲叢桂文會以文卷赴者五百餘人延楊
鐵崖江朝宗讀書桐香室埋名不出時貝瓊結屋
父山鮑恂居郡城之西溪四方避地者溫州陳秀
民居竹隣巷閩人卓成大居甌川江陰孫作居南
湖崑山顧德輝居合溪天台徐一夔居春波門外

河南高巽志江都丘民錢塘陳世昌皆來僑居四
明周棐以宣公書院山長畱居梨林日以文酒倡
酬山水間傳爲勝事云

自題桐香室

研經暇即課子掃榻倦亦畱賓莫嘆秋風蕭颯穿林月
片如銀


沈元啟

辛未年予在京師朱檢討於真蹟中得元人攜李

沈元啟題畫一詩因錄於此

題錢舜舉桃源隱居圖

青山何處桃花邨白雲如龍繞山根眼中茅屋參差起
若此境趣皆桃源桃源只在人間世流水無情達朝市
重山遮不斷春風萬樹桃花雜雲氣溪上高軒絕瀟灑
人物衣冠猶大雅水行有船陸有馬吾將往問種桃者



馮李詩繫卷五